



御選宋詩卷第三目錄

四言詩二

蘇轍十二首

孔武仲一首

陳襄五首

彭汝礪一首

傅察一首

李綱四首

曹勛一首

鄭剛中五首

羅願六首

御選宋詩

卷三目錄

張栻二十四首

陳造十首

葉茵一首

葉適一首

林希逸一首

邵桂子一首

錢仲鼎一首

文天祥五首



御選宋詩卷第三

四言詩二

蘇轍

和子瞻次韻陶淵明停雲詩

并引

丁丑十月海道風雨愴雷郵傳不通子瞻兄和陶
淵明停雲四章以致相思之意轍亦次韻以報

雲跨南溟南北一雨瞻望匪遙檻穽斯阻夢往從之引
手相撫笑言未半捨我不佇

晚稻欲登白露霄濛人飲嘉平漿酒如江我獨何為觀
成于窗此心了然來無所從

欣然而笑是無枯榮手足相依所種則情情忘意消神
御選宋詩

卷三

蘇轍

一

凝不征可以安身可以長生

跋扈飛揚誰匪南柯運歷相尋憂喜雜和我游其外所
享則多削迹拔木其如予何

和子瞻次韻陶淵明勸農詩

并引

子瞻和淵明勸農詩六章哀儋耳之不耕予居海
康農亦甚惰其耕者多閩人也然其民甘於魚鰕
蟹鰕故蔬果不毓冬溫不雪衣被吉貝故藝麻而
不績生蠶而不織羅紈布帛仰於四方之負販工
習於鄙朴故用器不作醫奪於巫鬼故方術不治
予居之半年凡羈旅之所急求皆不獲故亦和此
篇以告其窮庶或有勸焉

我遷海康實編于民少而躬耕老復其真乘流得坎不問所因願以所知施及斯人

我行四方稻麥稔稷果蔬蒲荷百種咸植糞溉耘耔乃後有穡爾獨何為開口而食

掇拾于川搜捕于陸俯鞠婦子仰薦昭穆聞乘其輸載未逐逐計無百年謀止信宿

我歸無時視汝長久孰為沮溺風雨相耦築室東皋取足南畝后稷為烈夫豈一手

斲木陶土器則不匱績麻纒繭衣則可冀藥餌具前病安得至坐而告窮相視徒愧

莫為之先冥不謂鄙一夫前行百夫具履以為不信出御選定詩

卷三 蘇轍

二

視同軌期爾十年風變而美

堂成

築室三年堂成可居我初不知諸子勞劬父母老矣風雨未除橐裝幾何勿問有無伐木于山因此舊廬不約不豐燕處無餘堂開六楹南北四筵晝明廓然夜冥黯然四鄰無聲布被麤壇身非蚌螺一睡經年夜如何其跌坐燕安善惡不思此心自圓東廂靖深以奉嘗烝老佛之廬朝香夜燈西廂千卷圖書之林先人所遺子孫是承杖屨經行直如引繩顧視而笑此如我心諸子之室左右我背將食擊板一擊而會瓜畦芋區分布其外鉏去瓦礫壤而不塊廢井重浚泉眼仍在轆轤雷鳴甘

兩時霈園夫能勤家足于菜有容叩門賀我堂成揖客
而笑念我平生三世讀書粗免躬耕明窗修竹惟我與
兄蔭映茅茨吐論崢嶸猖狂妄行以得此名老而求安
匪以爲榮

雙柳

我作新堂中庭蕭然雙柳對峙春陽旣應千條萬葉風
濯雨洗如美婦人正立櫛髮髮長至地微風徐來掩冉
相繆亂而復理垂之爲纓縮之爲結屈伸如意燕雀翔
舞蜩蚻斯鳴不召而至清霜夜落衆葉如剪顏色憔悴
永愧松柏歲寒不改見歎夫子聊同淵明攀條嘯詠得
酒徑醉一屨粗給三黜不去亦如展惠

御選宋詩

卷三

蘇轍

孔武仲

三

孔武仲

江豚詩

黑者江豚白者白豨狀異名殊同宅大水淵有羣魚掠
以肥已是謂小害顧有可喜大川夸平縞素不起兩兩
出沒矜其頰觜若俛若仰若躍若跪舟人相語驚瀾將
作亟入灣浦蹈檣布笊俄頃風至簸山搖岳浪如車輪
氛霧相薄舟人燕安如在城郭先事而告昭哉爾功鱣
嚼牛馬頭鼉象龍暴殄天物安得爾同于人無害所欲
易充暴露形體告人以忠又多膏油以助女工江湖下
貧機杼以農烏鵲知風商羊識雨大厦之下風雨何苦
豈知舟航方在積險以爾占天著蔡之驗古之報祭不

遺微蟲孰揚爾烈登薦蜡宮世不爾好復惟爾惡我作此歌爲昭其故

陳襄

郊祀慶成詩

皇帝即位厲精求治翼翼兢兢以畏天異乃見宗廟乃嚴郊祭赫赫烈祖陟配上帝皇帝肇祀心虔誠至齋居徹饁夙興弗寐不履黃道不御小次出宿于廟陰雨翳翳既其徂郊日出晰晰登丘奏假天地澄霽禮終樂闋神貺來暨皇帝還蹕千乘萬騎雷動天旋臣民欣慰御樓賜赦躬冊母地恩流澤洽周匝無際惟誠感神惟德銷沴皇帝能嚮時賜坐致臣願皇帝事天寅畏左右惟御選宋詩

卷三

孔武仲

陳襄

彭汝礪

四

賢安民惟惠無咈忠諫無輕政事日新一日庶答天意

登彼公堂燕貢士

登彼公堂維水湯湯君子燕滑其言有章

登彼公堂有松有柏君子燕滑其儀孔特

登彼公堂維山崔嵬君子燕滑其志不回

登彼公堂鴻飛戾止君子燕滑維其不已

彭汝礪

送范侍郎歸許昌

鳳鳴嗒嗒其羽儀儀其集伊何梧桐之枝鴻飛冥冥其翼差差其止伊何清泠之池朝廷于公夫豈不知國有大疑爰度爰咨公雖家居如在廟堂國之大經論討靡

忘公在仁宗時數論尺度是非去年朝廷修樂公亦預議今雖家居然討論猶不廢徐徐公車在汴之郊薄言

追之以永今朝汎汎公舟在河之陰薄言維之以慰我

心公賜我言我斯藏之何以報之羔羊素絲秉德不遺

公飲我酒我斯酬之何以祝之秀髮履着受福無期

傅察

送傅倅

洛之水兮其流舒舒公之來兮朱服熊車士元展驥仲
舉題輿公之來兮民斯樂胥洛之水兮其流洋洋公之
化兮春雨秋陽袴襦頌洽禾黍歲穰公之化兮民斯悅
康洛之水兮其流瀾瀾公之去兮旌旗旖旎父老攀轅
摺紳方軌公之去兮瞻望徒倚洛之水兮其流洄洄公
御還宋詩卷三 彭汝礪 傅察 李綱五
之德兮此邦所愒吏遵其畫人懷其惠公之德兮久而
弗替洛之水兮其流活活公之名兮茲其彌達翔于朝
著騫乎省闈公之名兮莫我敢遏

李綱

余來湖外家問不通者累月因和淵明停雲一

篇以遣懷

上天停雲以陰以雨我之懷矣川路修阻田園將蕪幼
稚誰撫鴈信來遲鶴立以佇

淒淒其風零雨其濛自去梁谿爰止西江一室蕭然卧

于北窗塊獨處此人誰我從

豈無軒裳誰適為榮人之生世亦以有情亂離瘼矣棄

家遐征知我如此不如無生
今夕何夕鵲遶庭柯載植其尾迭相鳴和發書占之遠
問爲多兆而未至我懷若何

曹勛

乾道聖德頌

并序

臣恭惟皇帝陛下膺上聖之期繼中興之統紹登
四載恭勤百爲迺乾道改元政事具舉營戎罷屯
黎民於變時雍廷臣小大率職致淮北之蝗入境
自斃秋成之積歲登大有是皆陛下聖德昭著雖
黃童白叟所不待言而知臣以草莽之賤迫桑榆
之年際遇四朝叨塵二府豈不知清明之時方深

御選宋詩

卷三

李綱 曹勛

六

貪戀大懼榮祿浮實莫允清議故控露忱悃仰竄
天聰特蒙賜俞已幸晚境安處閒退日聽康衢熙
熙之謠顧老臣不當以翰墨輒塵宸扆然抃蹈之
餘有不能自己者謹擬元和之作極思選言撰成
乾道聖德頌昧死上進雖未能形容聖德之萬一
庶少伸臣子歸美之誠其辭曰

維聖有作紹隆興運天經地義宗堯越舜風俗醇厚日
星清潤冰天桂海咸祇成訓皇矣藝祖肇開宗祊用集
大命再造羣生卜世卜年周室與京德懋聖孫區宇再
寧龍潛出震握符御極恭儉慈仁已隆燕翼勵精治具
羣工惟辟斯皇聖德以受方國躬秉要道化成斯民間

寢侍膳克勤日新刑于四海率土興仁至矣聖孝悅安
嚴親猾夏餘種久失我重稍恢雄略盡還尊奉復脩絳
樂亟續騫貢布昭聖武式皇鉅宋洪宣景命受振皇綱
詔令諭旨粉澤八荒宸奎逸彩龍鳳騫翔煥乎聖文彬
彬日彰誕敷武節克柔強鷲風靜邊柝煙沉晚燧稽夫
力田塞馬垂轡巍巍聖功允格康濟光啓元良鶴禁建
儲遴擇端方贊翊詩書濬哲文思日親睿謨於赫聖明
有開令圖當天執籙了無玩好貴異獻輸蕩然一掃力
敦嘉靖詢謀政要不鑠聖斷坐臻是奧從容總攬用體
乾剛文武一道督以經常王化溥博景風丕祥格天聖
治時雍時康咫尺威顏豁達方寸日角珠庭金聲玉振
御選宋詩

卷三

曹勛 鄭剛中

七

穆穆皇皇天儀明潤洪惟聖表萬寓朝覲乃武乃文止
戈好生華夏蠻貊底于不平罔或反汗克斷惟明長策
遠馭奕奕天聲寶緒重光密答純祐旣協皇極昭報方
茂堯父舜子撫封增舊行復九有亘萬萬壽大哉乾元
萬物資之赫赫明世吾君繼之熾昌隆祚惟皇造之億
萬斯年惟皇保之

鄭剛中

南陔詩

并序

南陔補亡也念劬勞之恩重痛逮事之無日故作
是詩以慕焉

陟彼南陔有風惟薰曷念劬勞華髮盈巾彼髮之華尚

可剪也嗟嗟吾親不可見也
陟彼南陔其薰遠兮慨我功名今亦晚兮功名之晚尚
可爲也嗟嗟吾親不可追也

彼居之子庭闈休休愛日之念胡弗省脩
瞻彼禽鳥亦哺其母養而弗驩于老奚取
敬爾身矣懌其親矣逮其暮矣云何吁矣

羅願

酬寺簿勸農追和淵明

江漢之會中具五民見異而遷乃喪厥真相彼樊山我
行所因有閑其壤問彼居人

方時清明家自爲稷其藪其浸其動其植孰爲使民有
御選宗詩

卷三

鄭剛中

羅願

張栻

八

田不穡亦惟蒲魚恃此鮮食

歲運周回景躔西陸帝籍重開天顏逾穆耕事將起毋
荒遊逐凡我農官戒民宜宿

戒民伊何美成在久譬彼射侯則求其耦驅率慵惰轉
緣南畝數云疾收在而心手

農亦有書匪藏金匱盍耕如莘盍饁如冀桑蔭清好濁
醪日至已勤而食則無所愧

勿謂此州遠連邊鄙我疆西北盡其四履風雨順時日
星循軌屢豐作頌以致歸美

張栻

淳熙四年二月旣望靜江守臣張某奉詔勸農

於郊乃作熙熙陽春之詩二十四章章四句以
示父老俾告於其鄉之人而歌之

熙熙陽春既發既舒翼翼南畝是展是圖
嗟爾農夫各敬乃事往利爾器誠爾婦子
惟生在勤勤則及時惟時之趨時不爾違
祈祈甘雨膏我下土習習谷風和澤乃普
往即爾耕惟力之深往蒔爾苗勿倦其耘
于日于夕自遂自達爾心勿忘彼生孰過
惟天之心矜我下民民不違天使爾有成
既穡既實既堅既好爾穫既周先養爾老
保爾家室撫爾幼穉既迄有年復思嗣歲

御選宋詩

卷三

張栻

九

嗟爾父老其訓其誠俾務于本惟土物愛
不念其本則越其思所思既越害斯百罹
嗟爾父老其告其喻爾之有生君實覆汝
尊君親上其篤勿忘小心畏忌率于憲章
嗟爾父老教之孝悌孰無父母與其同氣
友于爾心孰無愛敬即是而推烏往不順
嗟爾父老勿替諄諄其未率從警厲其身
告以禍患其使知懼無俾蹉跌以陷罪罟
惟國之法煌煌其垂使爾知避豈欲爾施
爾或自陷予疚予恫曷使予懷寘于爾衷
於赫聖主敷德流澤布宣弗厯時予之責

咨爾父老助予念茲豈予之助報國自宜
粵以今日勸相于郊乃作此詩以懋爾勞
咨爾父老尚演厥義其諷其歌于鄉于里
俾一其心服我訓言擊鼓坎坎自古有年

陳造

次程帥勸農和陶詩韻

并序

房民種藝簡率水旱豐歉一委之天人力不至且
不知用水車土皆桑柘地而蠶事尤鹵莽因帥勸
農和陶詩次韻呈帥且示其民之不甚愚惰者

我官于房庸諗房民是腹枵然惟貯一眞服事告工以
成以因雄也言之參天以人

御選完詩

卷三

張拭

陳造

十一

燥之潤之是有黍稷天不竟刈物豈自植繫人之力溫
飽稼穡惟蠶而衣如稼而食

盍槌于家盍桑于陸飼眠後先如族昭穆爰繰爰織如
寇之逐悠悠玩日迄莫歸宿

孰溉不車曾不計久孰視槁乾徒用播耦吳豐楚約誰
非朕畝穗斯爾斯均措厥手

彼多其儲汝則易置倣勞計工寧終不冀蹠躩十駕與
驥一至朽中亦立吾代爾愧

吏職民憂無庸汝鄙農以濟學繫吾素履豈曰多言率
遵前軌教詔順從庶或兼美

程帥和陶二詩見憶次韻

我瞻西郊雲停不雨雞栖亂山十舍千阻一書緘春尉
厲存撫望之或違搔首企佇

停雲醜之蜚雨濛濛啓筒有獲如渴吸江孤月河漢輕
颺牖窗憶侍誨色杖屨後從

盱衡推予褒袞儷榮靡懷不傾靡言不情會晤良難歛
然西征孰謂愁斛無自而生

竹萌觸雪粟花綺柯風日山城未春已和命駕取塗計
日不多官曹簡書公其謂何

葉茵

別可山

松江之左可漁可農古樹陰陰碧波溶溶子契子好攜

御選宋詩

卷三

陳造

葉茵

葉適

十一

家而從載笑載語乃棹輕篷冥訪前脩天隨室邇中心
孔嘉爰居爰止有薰自南景物清美槐柳于前煩歎潛
弭吾有旨酒與子酌之既醉且舞且歌而詩陶然樂只
厥情怡怡一日舍去豈不念茲客懷先秋興言欲別屢
止屢辭行計已決送子于舟期我乎雪敬哉前邁于時
炎熱惆悵若失延佇長津復面猶賒奈何夕晨豈無他
友白首如新念子實繁融融天真北山有梅南山有雲
下有猿鶴中有隱君千里命駕余敢不厯乃志必獲載
歌斯文

葉適

題人扇

外德欲晦面目自蔽內德欲耀肝膽畢照二法相除我則有餘穆如清風用之不窮

林希逸

題江貫道山水

遠山叢叢遠樹濛濛咫尺萬里江行其中短長何岸高低何峰彼坻彼峙彼瀑彼洪晴嵐乍豁煙靄蔥蘢或斷或續且淡且濃爾萃奚寺爾盤奚宮或垣陰翳或梁嵌空有吠者厖有樵者翁危檣落碇短棹掀篷往來異趣寂動殊容幕翠其庭豈非盧鴻略約而渡豈非龜蒙昔我經行雲山萬重若淮南北與江西東亦蓑而雨亦帽而風乃今追惟夢境相從及此開卷恍然昔同誰居作御選宋詩

卷三

葉適 林希逸 邵桂子

三

者造化論功淹總其裔熙成是宗聲聞九陛既召而終謂彼樹白識其身窮其然豈然訊之天公此名穹壤疇曰不逢

邵桂子

疏屋詩爲曹雲西作

草菜可食總名曰疏品題有圃樹藝有書衡縱町畦周繞屋廬繚以樊垣經以浜渠晨出抱甕夕歸荷鋤有蔓必薈有蝗必驅風披雨沐日烜露濡穉甲怒生嘉苗蔚敷芥薑杞菊韭薤蒜葫蔽蔽藜藿瓜瓞匏瓠楮雞桑鶯籜龍稷魚馬齒鹿角鼠尾虎鬚薯蕷蔓菁杜蘅薜蘿茵陳莪蘿茺蘭茹蘆赤莧銀茄翠荇墨菰酸漿辣蒨甘薺

苦茶庖人調脯園丁拮据錡釜鬻煤筐筥貯儲椒橙內
交醞醢効劬以芼以湘可茹可殖維昔尼父瓜祭齊如
飲水曲肱其樂只且召南蘋藻韓奕筍蒲知味羨黃咬
根歎胡葵蓼飫顛蔥韭厭徐火芋明瓊山菌接輿庾郎
三種石生一孟劉叅玉版蘇傳冰壺巢字元修鮒姓豆
盧菘羔抱孫蹲鴟將雛絲滑露葵練淨土酥野薺餽飽
水苔脯脰餅炊菠稜鮓釀苞蘆胡麻饋留罌粟醍醐萍
蘘西晉蓴羹東吳芹擷泥坊藤采豐湖沼汜有鱉江漢
有萋岡有常泉洲有接余鴈門天花黃河磨菇大菟首
菹太華芙蕖環滌野菽盤谷山茹地饒所產天茁此徒
菲葑是采口腹以娛落英未莎初篁未箨霜根旋挑露
御選定詩

卷三

邵桂子

錢仲鼎

三

葉半舒烹泉石鼎養火地壚色炫七箸香浮杵杆氣含
土膏味逾天廚肥生華池響鳴輔車商顏飢解文園渴
甦前招麴生後引酪奴饌非羶葷餉非苞苴園無羊踏
壤有鼠餘彼哉肉食俎列豢芻心炙椎牛項鬻割猪春
羔秋麝冬蠶夏胸猩脣豹胎麋鸞蟹胥緇裘解龜銀絲
膾鱸羊尾截肪錦襖脫膚山殺雉兔澤羞鴈鳧北饌潼
酪南烹鼃蝮嗜鼠則鴟甘帶則蛆迺笑鄭老爛蒸瓠齏
乃笑坡翁夢餐雞蘇屬厭饕餮飽死侏儒語以疏味能
知否乎予雅嗜之日不可無乃顏茲屋羞供是須寧疏
而癯毋肉而腴易牙司味敢告膳夫

題趙鷗波高士圖

在昔洛陽雪深丈餘士也高卧來令尹車今年吳淞雪
復何如積素一色鷗鷺有無之子江臯修亭是居
有琴有書有酒有魚賞靜獨眺聊以自娛挹落清風凜
凜起予此景此圖再卷再舒

文天祥

贈劉矮跛相士

鍊石爲形鏗金爲音世方好圓癡守方心陰陽網縕人
一氣質善惡之微證于聲色意所欲發雖吾不知彼美
子劉洞其先幾骯髒難合今世道病如子所言生稟已
定顛夫勇士往往一偏以視妾婦豈不猶賢洪範得三
御選宋詩

卷三

錢仲鼎

文天祥

齒

二曰剛克會其歸其好是正直學問工夫氣質用微汝
能觀形安知其餘子術已定吾情已成子執子術吾安
吾情

贈楊樵隱應炎談命

莘郊一介堯舜君民薇山二難百世忠清富春釣叟涕
洩雲臺終南遜士仕宦梯媒是數公者俱以隱名木石
一跡霄淵異情九華山人賣樵江湖請算世間幾種樵
夫

題毛霆甫詩集

英英白雲在澗之瀆彼美人兮其德孔純
英英白雲在澗之阿彼美人兮其思孔多

白雲英英澗水泱泱彼美人兮碩大且昌


御選宋詩卷第三

御選宋詩

卷三

文天祥

十五



御選宋詩卷第四目錄

樂府歌行一

徐鉉二十二首

田錫八首

寇準三首

張詠二首

王禹偁六首

韓琦七首

范仲淹二首

文彥博三十首

尹洙九首

御選宋詩

卷四

目錄

張方平七首

石介二十三首

歐陽修四首

梅堯臣四首

御選宋詩卷第四

樂府歌行一

徐鉉

柳枝辭十二首

把酒憑君唱柳枝也從絲管遽相隨逢春只合朝朝醉
記取秋風葉落時

南園日暮起春風吹散楊花雪滿空不惜楊花飛也得
愁君老盡臉邊紅

陌上朱門柳映花簾鈎半捲綠陰斜憑郎暫駐青驄馬
此是錢塘小小家

夾岸朱顏柳映樓綠波平幔帶花流歌聲不出長條密
御選宋詩

卷四

徐鉉

忽地風回見綵舟

老大逢春總恨春綠楊陰裏最愁人舊遊一別無因見
嫩葉如睂處處新

濛濛堤岸柳含煙疑是陽和二月天醉裏不知時節改
漫隨兒女打鞦韆

水閣春來乍減寒曉妝初罷倚闌干長條亂拂春波動
不許佳人照影看

柳岸煙昏醉裏歸不知深處有芳菲重來已見花飄盡
惟有黃鶯轉樹飛

此去仙源不是遙垂楊深處有朱橋共君同過朱橋去
密映垂楊聽洞簫

暫別揚州十度春不知光景屬何人
一帆歸客千條柳腸斷東風楊子津

仙樂春來按舞腰清聲偏似傍嬌嬈
應緣鶯舌多情賴長向雙成說翠條

鳳笙臨檻不能吹舞袖當筵亦自疑
唯有美人多意緒解衣芳態畫雙睂

柳枝詞十首 座中應制

金馬詞臣賦小詩梨園弟子唱新詞
君恩還似東風意先入靈和蜀柳枝

百草千花共待春綠楊顏色最驚人
天邊雨露年年在上苑芳華歲歲新

御選宋詩

卷四

徐鉉

二

長愛龍池二月時
珍珍金線弄春姿
假饒葉落空枝後更有梨園笛裏吹

綠水成文柳帶搖
東風初到不鳴條
龍舟欲過偏留戀萬縷輕絲拂御橋

百尺長條浣麴塵
詩題不盡畫難真
憑君折向人間種還似君恩處處春

風煖雲開晚照明
翠條深映鳳凰城
人間欲識靈和態聽取新詩玉管聲

醉折垂楊唱柳枝
金城三月走金羈
年年爲愛新條好不學蒼華也是絲

新春花柳競芳姿
偏愛垂楊拂地枝
天子徧教詞客賦

宮中要唱洞簫詞

凝碧池頭蘸翠漣鳳凰樓畔簇晴煙新詩欲詠知難詠
說與雙成入管絃

侍從甘泉與未央移舟偏要近垂楊櫻桃未綻梅花老
折得柔條百尺長

田錫

江南曲三首

金蟬飾綠雲細靨藥黃新南浦解清珮西谿采白蘋密
竹映深花湖山日欲曛春腸知己斷脉脉兩難親
吳艷若芙蓉乘舟弄湖水照影不知休雲鬢墮簪珥含
笑忽迴頭見人羞欲死歸去入花谿棹濺鴛鴦起

御選宋詩

卷四

徐鉉 田錫

三

金陵王氣銷六朝墮霸業白雲千古恨空江照樓堞虎
丘羅蔓草姑蘇委楓葉懷賢思伍員靈濤浩難涉

晚雲曲

高唐晚峰欲生雨空山啼猿風嘯虎卷雲數片留南浦
自與鴛鴦共飛舞

倚柱吟

暮春慘慘黃昏雨零落櫻桃斜掩戶未張燈火簾幕深
樓閣巢寒聞燕語昔時常說長安好而今厭走長安道
蘇秦辨說長卿才自笑功名何不早人悄悄倚柱時情
脉脉無人知憐春惜遠情不盡斜雨兼花閨濕衣

紫雲曲

沉沉鸞殿垂珠箔祥煙瑞氣含樓閣三十六宮明月中
夜靜無風花自落寶屏珠帳一夢時靈仙初降趨丹墀
煙衣霞綬赤瑛珮鈞天樂部前參差合奏鏗鏘向金屋
云是仙鄉紫雲曲朱弦遠召舜湘靈鳳管應呼秦弄玉
天漢星流夜旣闌露零珠樹彤庭寒芙蓉枕上夢初覺
猶聞庭際聲珊珊上曉五音十二律仙曲記時心歷歷
金線龍頭紅玉笛新聲吹得雲飄逸應是夔襄樂府魂
翻得雅音聞至尊俾與霓裳羽衣曲迺相奏向梨花園

春洲謠

衣鮫綃兮美人采白蘋兮水濱裊羽翅兮爲飾步羅襪
兮生塵絲絲兮遠道萋萋兮芳草遠山省兮淡掃

御選定詩

卷四 田錫 寇準

四

短歌行

曉月蒼蒼向煙滅朝陽燄燄明丹闕杜鵑催促躑躅開
鷓鴣已鳴芳草歇芳春苦不爲君留古人勸君秉燭遊
願與喬松弄雲月紫泥仙海鸞凰洲

寇準

古別意

水螢光淡曉色寒庭除索莫星河殘清樽酒盡艷歌闌
離人欲去肝腸絕露荷香散西風驚征車漸遠聞雞鳴
深閨從此泣秋扇夢魂長在遼陽城

江南春二首

波渺渺柳依依孤邨芳草遠斜日杏花飛江南春盡離

腸斷蘋滿汀洲人未歸

杳杳煙波隔千里白蘋香散東風起日落汀洲一望時
愁情不斷如春水

張詠

柳枝詞

青連遠戍和煙重靜映疎櫳窳縷輕遊子不歸春夢斷
南邨一樹看啼鶯

遠映天街近遶池長條無力自相依上陽宮女愁方絕
又見東風有絮飛

王禹偁

拍板謠

御選宋詩

卷四

寇準

張詠

王禹偁

五

麻姑親採扶桑木鏤脆排焦其數六雙成捧立王母前
曾按瑤池白雲曲幾時流落來人間梨園部中齊管絃
口中纔動我能應知音審樂功何全吳宮女兒手如筍
執向玳筵為樂準數聲慢仙人屐齒下雲棧老狐臘月
渡黃河緩步輕輕踏冰片數聲急空江電打漁翁笠鮫
人泣對水晶盤滿抱珠璣連瀉入劃然一聲送曲徹由
基射透七重札金罍冷落閒無聞隴頭凍把泉聲絕律
呂與我數自齊絲竹望我為宗師總驅節奏在術內歌
舞之人無我欺所以唐相牛僧孺為文命之為樂句

畬田詞

有序

上雒郡南六百里屬邑有豐陽上津皆深山窮谷

不通轍跡其民刀耕火種大底先斫山田雖懸崖
絕嶺樹木盡仆俟其乾且燥乃行火焉火尚熾即
以種播之然後釀黍稷烹雞豚先約曰某家某日
有事於畬田雖數百里如期而至鋤斧隨焉至則
行酒啗炙鼓譟而作蓋劓而掩其土也掩畢則生
不復耘矣援桴者有勉勵督課之語若歌曲然且
其俗更互力田人人自勉僕愛其有義作畬田詞
五首以侑其氣亦欲採詩官聞之傳之於執政者
曰苟擇良二千石暨賢百里使化天下之民如斯
民之義庶乎汙萊盡闢矣其詞俚欲山人之易曉
也

御選宋詩

卷四

王禹偁

六

大家齊力斲孱顏耳聽田歌手莫閒各願種成千百索

山田不知畝畝但以百尺繩量之曰某家今年種得好若干索

豆其禾穗滿青山

殺盡雞豚喚劓畬田來遍互作生涯莫言火種無多利

樹種明年似亂麻

種穀之明年自然生禾山民獲濟

鼓聲獵獵酒醺醺斫上高山入亂雲自種自收還自足

不知堯舜是吾君

北山種了種南山相助力耕豈有偏願得人間皆似我

也應四海少荒田

畬田鼓笛樂熙熙空有歌聲未有詞從此商於爲故事

滿山皆唱舍人詩

韓琦

柳枝詞五闋

樓前輕雪未全銷，偷得春光入嫩條。似向東風猶綽約，可能渾忘舞時腰。

陌閒宮古綠煙迷，惹盡春愁困拂堤。却爲多情足離恨，故教溝水亦東西。

章街風曉起新眠，寒食輕陰未雨天。無限青絲拂遊騎，一生芳意負金鞭。

輕煙輕日簇誰家，微出青旗一帶斜。對景似嫌春意老，更搖疎影拂殘花。

畫橋南北水連天，纔聽鶯聲又晚蟬。長使離魂容易斷，春風秋月自依然。

御選宋詩

卷四

韓琦

范仲淹

七

再賦柳枝詞二闋

曲江風暖曉陰斜，翠色相宜拂鈿車。自是春眠猶未起，日高人困又飛花。

葉葉新長約黛蛾，絲絲輕軟任風梭。啼鶯便學歌喉轉，知是春來舞意多。

范仲淹

明月謠

明月在天西，初如玉鈎微。一夕增一分，堂堂有餘輝。不掩五星耀，不礙浮雲飛。徘徊河漢間，秀色若可餐。清風起叢桂，白露生階蘭。高樓望君時，爲君拂金徽。奏以堯舜音，此音天與稀。明月或可聞，顧我亦依依。月有萬古

光人有萬古心此心良可歌憑月爲知音

清風謠

清風何處來先此高高臺蘭叢國香起桂枝天籟迴飄度清溪浮雲安在哉萬古鬱結心一旦爲君開有客慰所思臨風久徘徊神若遊華胥身疑立天台極渴飲沆瀣大暑執瓊環曠如攜松丘騰上煙霞游熙如卽莊老語入逍遙道朱絃鼓其熏可以解吾民滄浪比其清可以濯吾纓願此陽春時勿使飄暴生千靈無結慍萬卉不摧榮庶幾宋玉賦聊廣楚王情

文彥博

郊祀歌二首

御選定詩

卷四

范仲淹

文彥博

降神

在國南方時維就陽以祈帝祉式致民康豆籩鼎俎金石絲簧禮行樂奏皇祚無疆

飲福

潔茲五齊酌彼六尊致誠斯至率禮彌敦以介景福永隆後昆重熙累洽帝道攸尊

朝會樂章八首

皇帝升坐隆安

天臨有赫上法乾元鏗鏘六樂儼恪千官皇儀允肅玉坐居尊文明在御禮備誠存

公卿入門正安

堯天協紀舜日揚光淑慎爾止率由舊章佩環濟濟金石鏘鏘威儀炳煥至德昭彰

上壽禧安

乾健爲君坤柔曰臣惟其臣子克奉君親永御皇極以綏兆民稱觴獻壽山嶽嶙峋

白龜

聖德昭宣神龜出焉載白其色或游于川名符在洛瑞應巢蓮登歌丹陛紀異靈篇

甘露

天德冥應仁澤載濡其甘如醴其凝若珠雲表潛結顯英允敷降于竹柏永昭瑞圖

御選定詩

卷四

文彥博

九

紫芝

煌煌茂英不根而生蒲茸奪色銅池著名晨敷表異三秀分榮書于瑞典光我文明

嘉禾

嘉彼合穎致貢升平異標南畝瑞應西成德至于地皇祇效靈和同之象煥發祥經

白兔

盛德好生網開三面明眎標奇昌辰乃見育質雪園淪精月殿著于樂章色含江練

親耕籍田樂歌七首

出大次

勤勞稼穡必躬必親爲籍千畝以教導民帝出乎震時
維上春天顏咫尺望之如雲

親耕

元辰旣擇禮備樂成洪縻在手祇飭專精三推一墾端
冕朱紘靡辭染屨以示黎甿

升壇

方壇屹立陛級而登玉色下照臨觀耦耕萬目咸覩如
日之升成規成矩百祿是膺

公卿耕籍

羣公顯相奉事齊莊率時農夫舉耜載揚播厥百穀以
佑我皇多黍多稌不應農祥

御選宋詩

卷四 文彥博

十一

羣官耕籍

畷畷良耜我田旣臧土膏其動春日載陽執事有恪于
此中邦農夫之慶棲畝餘糧

降壇

肇新帝籍率我農人三推終畝祇事成均陟降孔時粢
然有文受天之祐多稼如雲

歸大次

教民稼穡不令而行進退有度琚瑀鏘鳴言還煩幄禮
則告成帝命率育明德惟馨

祭文宣王廟樂歌四首

迎神

大哉至聖文教之宗紀綱王化丕變民風常祀有秩備
物有容神之格思是仰是崇

初獻

右文興化憲古師今明祀有典吉日惟丁豐犧在俎雅
奏來庭周旋陟降福祉是膺

奠幣

一王垂法千古作程有儀可仰無德而名齊以滌志幣
以達誠禮容合度黍稷非馨

酌獻

自天生聖垂範百王恪恭明祀陟降上庠酌彼醇旨薦
此令芳三獻成禮率由舊章

御選宋詩

卷四

文彙博

十一

折楊柳

長憶都門外低垂拂路塵更思南陌上攀折贈行人
人經歲別楊柳逐年新何當逢塞鴈重寄一枝春

關山月

蕩子久行役遼西戍未還佳人怨遙夜清淚浥朱顏
薛晦蘭閨寂塵昏寶鏡閒相思不相見明月下關山

采蓮曲

江南秋色早江上早蓮芳佳人采紅萼兩槳渡橫塘
翳日華芝薄隨風綿絳長蕩舟方自樂綠水任霑裳

夜夜曲

明月流清漢娟娟照洞房微風吹敗葉颯颯下銀牀
塵

晦流黃素鑪銷辟惡香年年機杼妾獨怨夜何長

長相思

遠別苦無悰離居常戚戚顧慕懷所歡徘徊彌自惜瓊
藥不可采瑤華未堪摘惟憑尺錦書一寄長相憶

陌上桑

佳人名莫愁采桑南陌頭因來淇水畔應過上宮遊貯
葉青絲籠攀條紫桂鈎使君徒見問五馬亦遲留

俠少行

錦帶佩吳鈎翩翩躍紫騮垂鞭度永埒挾彈過長楸平
樂十千酒南城百尺樓荆娥拂雙袖日夕又遲留

陽春曲

御選宋詩

卷四

文彥博

尹洙

一三

頗傷金管遽仍恨緹光促四序若循環百年如轉軸佳
人暮不歸蘭茗春又綠空持綠綺琴愁弄陽春曲

巫山高

巫山高不極高高與碧穹齊朝雲常藹藹暮雨復淒淒髣
髴聞珠佩依稀認繡袿無能留彼美徒使夢魂迷

尹洙

皇雅十首

天監受命也自梁至於周兵難不息宋受命統一
萬方焉

天監下民亂靡有定甚武且仁祚厥真聖仁實懷袞武
以執競匪虔匪劉拯我大命自昔外禪月經日營令以

挾制政以陰傾帝初治兵志勤于征奄受神器匪謀而成淮潞弗虔卒汙叛迹戎輅戒嚴皇威有赫彼寇誑民吾勇其百殄厥渠魁貸其反側帝朝法宮左右宗公愷夫悍士以雍以容爾居爾室爾工爾農旣息旣養惟天子功

西師征蜀也

王用西師岷梁弗賓匪曰負固實交晉人予訓予誓合我將臣正厥有罪無庸傷民矯矯虎士載摧其壁于嗟孟侯亦果其策迎師而降靡抗鋒鏑豈獨身謀完是宗國蜀都旣平將臣失律此衆悍驕彼民危慄當塗叫呶合萬爲一匪懷則威帝心是恤帝曰將臣予嘉乃庸廢命毒民爾弗有終邦典用疑惟罪惟功靡極而削協于厥中帝曰孟侯受封于楚旂旃戈備物異數俾爾族姻及乃文武服在王庭靡不有序蜀民呼歌天子威靈保我者封暴我者刑匪勁是和匪弱是陵天子惠民疇敢不承

耆武受俘也命將伐南海平金陵俘二王以獻

耆武定功時惟二方淮服其義海南遂荒孰孱而盞孰暴而猖自底不諛乃終滅亡帝戒二俘同即爾誅予惟民無辜休息是圖時其輯矣寧威獨夫帝嗟汙邦久罹于兵或暴下以征或數虐以刑予命中典協于國經民服德音室家以寧

憲古令守臣也削其附庸以強帝室焉

帝懷永圖治古是憲四方守臣惟屏惟翰在昔艱難弗
惠訓典跨都連城高牙以建有土有民肆乃征繕以息
以容終焉叛渙凡今帥臣狃厥聞見匪革亂源曷清多
難帝告庶邦式是典彛元侯顯父戚臣宗支正乃封圻
予一人是毗凡曰附城罔爾俾之畜兵厚賦靡爾得私
毋凶而國作福作威天子有命疇敢不祇子孫承承唯
萬世規

大鹵王師討晉罪也

冀州之疆粵惟大鹵俗伎而專地扼而固協比幽都蕩
搖邊圉三垂旣摧兇威弗沮帝御六師百萬貔虎剪其

御選宋詩

卷四

尹洙

十四

附庸至于城下鋒鏑始交梯衝如舞蠢爾辱王請附降
土我士奮揚願究吾武皇帝曰吁念彼黎庶匪鯨匪鯢
復爲王土晉郊旣平九區以寧陳功太廟告假威靈在
昔武王于商觀兵惟我藝祖亦勤于征匪貸晉罪俟厥
貫盈聖作聖繼巍巍相承皇矣二后功莫與京

帝籍修故典也躬耕以勸農焉

帝籍于郊典儀具陳務農以訓供祀以勤祀在于誠匪
勤于人訓農以實匪訓以文帝謹二物乃躬乃親公侯
卿士暨厥庶民千甸有服飭哉惟寅帝賚高年式宴且
喜種種黃髮族丘而議我生艱難暴亂以繼耳徃金鼓
目狎戎器皇其我圖親講農事有子有孫力田孝弟鼓

舞至仁薰焉如醉

庶工任賢也

帝咨庶工疇其輔予俊乂以登厥勞乃圖匪忘舊勲非賢勿俞巍巍袞台盛德以居任賢伊何昌言是庸勉告爾猷罔恤迺躬豈無直辭拂于予衷予不爾疵爾無面從始時從官戎容揚揚今帝左右儒冠煌煌朝廷以尊文物典章得人之盛奕世重光

帝制北方請盟也

帝制萬邦罔有弗賓蠢爾化外羈焉勿臣威格三方稽顙獻珍匪茹革心願交使人帝謀公卿列侯庶校咸曰彼心暴戾陰狡既擾我疆復利吾寶無若勵兵襲其還道皇曰有衆予實念茲戰無必勝矧其歸師借曰大獲疇能盡之益俾餘醜毒吾朔陲乃俞其盟北州以綏在漢世宗抗威速攻暴農算商經用弗充中區震駭漢室始空降及後世猶稱厥功於穆皇考德無與偕匪勤于兵荒服遂來逮是三紀遠俗以懷生民休息嗚呼仁哉

皇治恤刑也帝仁于明刑在位者以寬恤爲治焉

皇底其治欽哉惟刑在疑而宥罔察爲明愛怒弗肆孰爲重輕毋一弗辜惟典之平前世理官倚法以刻匪彼爲仇蓋曰任職今之蔽獄務正其辟鑒于前人繫我仁德皇德在仁寢而成風公侯卿士靡不率從麇卵萌生咸保厥終不鄙不天樂哉融融

太平封祀告成功也

噫太平無象兮世烏得而知維盛德可迹兮其封祀之儀東岱宗兮西汾睢禮上帝兮賓地祇皇有征兮吾民以嬉皇有祈兮吾民是私天敷佑兮俾皇之釐億世永寧兮無疆之基

張方平

宋頌

祈汾陰祀后土也

萬邦清和歲乃薦有思皇烈祖既勤繹止撫有疆土迄若正命妥綏有家於嘻承武敦尚繹思亦既顯報以外以降以禋以祀報時介育介育不已生物靡靡降福侈御選宋詩

卷四

尹洙

張方平

七

侈其達驛驛其豐蕤蕤

天監有事于南郊也

昊天蓋高降監顯在於亶熙哉詔佑我有宋三后介之天命可畏翼翼保之對越在上維懷格思乃眷不違福祖繁錫宜我子孫永以無斃

有浚者泉大裕祖宗也

有浚者泉匪長自源皇建民極彌萬世則允時帝軒之力肆有羨德小侯國是宅大龜是食帝命不越炎德原發丕顯后祖懿德之平聖猷庭庭帝命是膺彤盧旌斧以征以輔洵烈且武肇荒東宇克寬克擾不澄不撓百休是保天祿始造江介既耨湖潭嶺陬右敘川蜀并汾

之首師行優優不犯不劉取其大球旂裳冠旒格其僭
戾悉公我謀三象霧霽無競無絀中葉奕章有猷有常
敷哲維人天錫無疆彌億萬年山嶽之固河流之長嗚
呼令王寔念茲來享

載耜修千畝也

月旅孟陬農事旣飭陽氣蒸達原隰充澤駕言徂郊載
耜告籍申命農畷率時主伯爰任疆游開其茨棘乃播
而實亟耘以擇旣發我公亦服爾私迄登稔成有獲丕
丕爰稟于廟積億及秭以豐粢盛以供酒醴以禮賓尸
以格祖禰旣登旣徹亦勞其耄以蜡以醑穡夫胥悅

朝元引

御選宋詩

卷四

張方平

七

星斗挂空碧鸞鶴翔紫清朝真弟子古壇上爐煙裊裊
金磬聲露脚斜白寒不動千山岑寂橫煙清絳闕太真
冠簡靜紫宮夫人璫珮鳴霞旌曉邁遺空谷石磴雲埋
瑶草綠殘蟾冷帖西南隅迴首塵寰煙一簇

老將行

聖明天子仁且英海寰內外歸神靈辭客相誇鳳皇詔
功臣不貌麒麟形繡旗塵卷霞紋閣古劒秋澀銅花青
尚餘舊受征西馬侍從日仗登云亭

桃源二客行

劉郎阮郎丹籙客桃花源中有舊宅間尋流水過碧溪
忽聞雞犬見人跡瓊臺瑤榭知何所紫雲深處開朱戶

鶴駕龍輶綵仗來鸞歌鳳舞霞觴舉世緣未斷塵心狂
苦厭仙家日月長洞門一閉恍如夢歸路古木何荒涼

石介

宋頌

皇祖太祖皇帝初用師伐潞州殺李筠伐揚州滅
李重進也

皇祖神武疇敢違拒元年四月筠畔于潞皇祖躍馬至
潞城下筠窘赴火焦頭爛髻

皇祖龍驤誰敢猖狂元年九月進叛于揚皇祖徐驅至
揚城隅進窘登樓并焚其孥

皇祖曰嘻物情難籌予代有周天時人謀罔有不同予
御選宋詩

卷四

石介

十八

德其休

予亦即祚涵濡養撫罔有失所予德其裕

筠胡予違進胡不隨予匪汝誅汝自取之
既剪二盜聖武燁耀荆潭蜀吳如拔腐草

聖神太祖皇帝出師援長沙且假道徑進取荆潭
也

不疾而速不怒而威惟聖惟神其幾其微

二國之君各保爾土虎憑于山莫予敢取蛟馮于淵莫
予敢侮萬斯年兮關鑄以固

聖機神謀天祕地藏風行雷動震于八荒旦秣我馬夕
取其疆二君不知晏眠于牀

具篙與舟同朝天子一發五祀二君皆至皇祖聖神鴻
光丕懿

湯湯太祖皇帝收蜀取孟祖也

湯湯其江區區爾孟一夫當關不知天命蟻固于穴蛙
負于井咫尺之地爲可以騁

彼以險守我以德懷王師東來函谷自開蜀主授首呼
號哀哀蜀人鼓舞與我偕來

昔時蜀道絕人來往今蜀既平王道蕩蕩尉侯一置朝
貢相望巍巍皇祖德聲遠暢

莫醜太祖皇帝用周渭之策命潘美取廣州也

莫醜匪虺莫悍匪兕有銀在南毒螫不已沸湯熱火暴

御選宋詩

卷四 石介

十九

我赤子

皇祖曰嘻天生蒸民樹之君長以養以仁乃予不恤匪
銀之罟

乃謀于渭乃將于美王師鷹揚涉江萬里闢其城門銀
號請死

皇祖有德乾覆坤容予在弔民不殺以封皇祖仁慈感
于昆蟲

金陵太祖皇帝命師取李煜也

金陵峩峩長江萬里誰爲巢穴養此蛇豕天豈作限而
險而恃不順不臣敢抗天子

帝赫斯怒王師徐驅叢爾螻蟻豈勝誅鉏哀窮俘爰

叫以呼歸于京師燁哉聖謨

聖文錢俶以吳越歸也

聖文安安聖武桓桓朝貢萬里正朔百蠻無吳之險無蜀之艱無潭之噍無荆之頑感于賓順悅色和顏

彼俶在杭有地千里皮毀毛落孤睽莫恃懾服聲教慕爲臣使攜彼人民挈其土地于橐于囊歸于天子

天子聖神罔不懷柔旣懷而封恩涵澤流逆子有刑視彼揚州順予有封視此錢侯赫赫宋德何有窮休

慶曆聖德頌

并序

三月二十一日大昕皇帝御紫宸殿朝百官相得象殊拜竦樞密使夸簡以司徒歸第二十二日制

御選定詩

卷四

石介

二

命昌朝參知政事弼樞密副使二十六日勅除修靖素並充諫官四月八日皇帝御紫宸殿朝百官衍樞密使仲淹琦樞密副使乃用御史中丞拱宸御史邈御史平諫官修靖十二疏追竦樞密使勅十三日勅又除襄爲諫官天地神人昆蟲草木無不歡喜皇帝退奸進賢發於至聰動於至誠奮於睿斷見於剛克陟黜之明賞罰之公也上視漢魏隋唐五代凡千五百年其間非無聖神之主盛明之時未有如此選人之精得人之多進人之速用人之盡實爲希闊殊尤曠絕盛事在皇帝之德之功爲卓犖瑰偉神明魁大古者一雲氣之祥一草

木之異一蹄角之怪一羽毛之瑞當時羣臣猶且
濃墨大字金頭鈿軸以稱述頌美時君功德以爲
無前之休丕天之績如仲淹弼寔爲不世出之賢
求之於古堯則夔龍舜則稷契周則閔散漢則蕭
曹唐則房魏陛下有之諸臣亦皆今天下之人望
爲宰相諫官者陛下盡用之此比雲氣草木蹄角
羽毛之異萬萬不侔豈可翻無歌詩雅頌以播吾
君之休聲烈光神功聖德刻於琬琰流於金石告
於天地奏於宗廟存於萬千年而無窮盡哉臣實
羞之臣嘗愛慕唐大儒韓愈爲博士日作元和聖
德頌千二百言使憲宗功德赫奕煒炳昭於千古
至今觀之如在當日陛下今日功德無讓憲宗臣
文學雖不逮韓愈而亦官於太學領博士職歌詩
讚頌乃其職業竊擬於愈輒作慶曆聖德頌一首
四言凡九百六十字文辭俚鄙固不足以發揚臣
子之心亦欲使陛下功德赫奕煒炳照於千古萬
千年後觀之如在今日也臣不勝死罪臣賤無路
以進姑藏諸家以待樂府之采焉

於維慶曆三年三月皇帝龍興徐出闈闈晨坐太極盡
開閭闔躬攬英賢手耒奸枿大聲颯颯風震搖六合如乾
之動如雷之發昆蟲躡躅妖怪藏滅同明道初天地嘉
吉初聞皇帝感然言曰予父子祖付予大業予恐失墜

實賴輔弼汝得象殊慎重微密君相予久予嘉君伐君
仍相予笙鏞斯協昌朝儒者學問該洽與予論政傅以
經術汝貳二相庶績咸秩惟汝仲淹汝誠予察太后乘
勢湯沸火熱汝時小臣危言業業爲予司諫正予門闈
爲予京兆聖予讒說賊叛于夏往予式遏六月酷日大
冬積雪汝暑汝寒同于士卒予聞辛酸汝不告乏予晚
得弼予心弼悅弼每見予無有私謁以道輔予弼言深
切予不堯舜弼自笞罰諫官一年奏疏滿篋侍從周歲
忠力盡竭契丹亡義檣杙饗餐敢侮大國其詞慢悖弼
將予命不畏不懼卒復舊好民得食褐沙磧萬里死生
一節視弼之膚霜剝風裂觀弼之心鍊金鍛鐵寵名大

御選宋詩

卷四

石介

三

官以酬勞渴弼辭不受其志莫奪惟仲淹弼一夔一契
天實賚予予其敢忽並來弼予民無瘥札曰衍汝來汝
予黃髮事予二紀毛禿齒豁心如一兮率履弗越遂長
樞府兵政毋蹶予早識琦琦有奇骨其器魁樞豈視居
榘其人渾朴不施剗可屬大事敦厚如勃琦汝副衍
知人予哲惟修惟靖立朝讞讞言論礪砢忠誠特達祿
微身賤其志不怯嘗詆大臣亟遭貶斥萬里歸來剛氣
不折屢進直言以補予闕素相之後含忠履潔昔爲御
史幾叩予榻至今諫疏在予箱匣襄雖小臣名聞予徹
亦嘗獻言箴予之失剛守粹慤與修儔匹並爲諫官正
色在列予過汝言毋鉗汝舌皇帝明聖忠邪辨別舉擢

俊良埽除妖魃衆賢之進如茅斯拔大奸之去如距斯
脫上倚輔弼司予調燮下賴諫諍維予紀法左右正人
無有邪孽予望太平日不逾浹皇帝嗣位二十二年神
武不殺其默如淵聖人不測其動以天賞罰在予不失
其權恭已南面退奸進賢知賢不易非明不得去邪惟
艱惟斷乃克明則不貳斷則不惑旣明且斷惟皇之德
羣下踧踖重足屏息交相告語曰惟正直毋作側僻皇
帝汝殛諸侯危慄墮玉失舄交相告語皇帝神明四時
朝覲謹修臣職四夸走馬墜鐙遺策交相告語皇帝神
武解兵修貢永爲屬國皇帝一舉羣臣懾焉諸侯畏焉
四夸服焉臣願陛下壽萬千年

御選宋詩

卷四

石介

歐陽脩

三

歐陽脩

馬鬣雪

馬飢鬣雪渴飲冰北風卷地來崢嶸馬悲躑躅人不行
日暮塗遠千山橫我謂行人止歎聲馬當勉力無悲鳴
白溝南望如掌平十里五里長短亭臘雪消盡春風輕
火燒原頭青草生遠客還家紅袖迎樂哉人馬歸有程
男兒雖有四方志無事何須勤遠征

風吹沙

北風吹草千里黃馬行确犖悲摧藏當冬萬物慘顏色
冰雪射日生光芒一年百日風塵道安得朱顏常美好
攬鞍鞭馬行勿遲酒熟花開二月時

歸田四時樂春夏二首

秋冬二首命
聖俞前分作

春風二月三月時農夫在田居者稀新陽晴暖動膏脉
野水汎灩生光輝鳴鳩聒聒屋中啄播穀翩翩桑下飛
碧山遠映丹杏發青草暖眠黃犢肥田家此樂知者誰
吾獨知之何不歸吾已買田清潁上更欲臨流作釣磯
南風原頭吹百草草木叢深茅舍小麥穗初齊雉子嬌
桑葉正肥蠶食飽老翁但喜歲年熟餉婦應知時節好
野棠梨密啼晚鶯海石榴紅囀山鳥田家此樂知者誰
我獨知之歸不早乞身當及彊健時顧我蹉跎已衰老
春寒曲效長吉體

東風吹雲海天黑飢龍凍雲雨不滴噴雷隱隱愁煙白

御選定詩

卷四

歐陽修

梅堯臣

三

宿霧無光瑤草寂東皇染花滿春國天爲花迷借春色
呼雲鑿日恐紅蕙幾日春陰養花魄悠悠遠絮繁空擲
愁思織春挽不得高樓去天無咫尺遠岫參差亂屏碧

梅堯臣

武陵行

生事在漁樵所居亦煙水野艇一竿絲朝朝狎清泚忽
自傍藤陰乘流轉山觜始覺景氣佳潛通小溪裏常時
不見春入谷驚紅藥幽興窮綠波翫芳心莫已花外一
峰明林間碧洞敞遙聞雞犬音漸悟人煙邇捨舟遂潛
行石徑劣容屣豁然有田園竹果相叢倚龐眉鬢髻人
倏遇心顏喜尚作秦衣裳那知漢名氏自言逢世亂避

地因居此來時手種桃今日開如綺更看水上花幾度
逐風委競引飯彫胡邀飲酌瓊醴復呼童稚前綠鬢仍
皓齒翻遣念還茅思歸釣鱸鯉將辭亦贈言勿道丘壑
美鼓柶出仙源繁英猶灑逸薄暮返滄洲微風吹白芷
他日欲重過茫茫何處是

一日曲

妾家鄧侯國肯愧邯鄲姝世本富繒綺嬌愛比明珠十
五學組紉未嘗開戶樞十六失所適姓名傾里閭十七
善歌舞使君邀宴娛自茲著樂府不得同羅敷涼温忽
荏苒屢接朝大夫相歡不及情何異逢路衢昨日一見
郎目色曾不渝結愛從此篤暫隔猶恐疎如何遂從宦
御選宋詩

卷四

梅堯臣

三五

去涉千里途郎跨青驄馬妾乘白雪駒送郎郎未遠別
妾妾仍孤不如水中鱗雙雙依綠蒲不如雲間鵠兩兩
下平湖魚鳥尚有託妾今誰與俱去去約春華終朝怨
日賒一心思杏子便擬見梅花梅花幾時吐頻掐欄干
數東風若見郎重爲歌金縷

挾彈篇

長安細侯尚年少獨出春郊不須曉手持柘彈霸陵邊
豈惜金丸射飛鳥金丸射盡飛鳥空解衣市酒向新豐
醉倒銀瓶方肯去去卧紅樓歌吹中不管花開與花老
明朝還去杜陵東

烏啄棗

樹頭陽鳥飢啄棗破紅滿地青蠅老青蠅雨濕驚不飛
殘棗入泥人不埽西風落盡烏亦歸晉容齒黃終懊惱

御選宋詩卷第四

御選宋詩

卷四

梅堯臣

五

